

## Szene 1      Sitzung mit Lorenzo di Ferrari

---

Zeit: 6'

Saallicht geht aus.

4 Mafiosi sind auf der Bühne, Musik mit Spannung, wenig Licht. Man reinigt das Lokal. Maurizio liest dabei ein Buch.

Lorenzo      Amici. Es gitt es Problem.  
Massimo      Es Problem?  
Luana      Gäld?  
Lorenzo      Richtig.  
Maurizio      Scho wieder.  
Angelina      Das hört nie uf.  
Lorenzo      De Mafiaboss of Sizilie, de Alessandro Capaci, verlangt's.  
Massimo      Wie vell?  
Lorenzo      (Pause, schaut alle streng an)  
600'000.  
Luana      Das wird jo immer meh!  
Lorenzo      Ich has euch jo gseid. Mit jedem missglöckte Versuech stiiigt  
d'Somme.  
Maurizio      Bis wenn?  
Lorenzo      i 30 Täg.  
Luana      So glii?  
Massimo      Ich würd sogar säge, so glii!  
Angelina      Das hett d'Luana jetzt jo grad gseid.  
Massimo      Ebe.  
Luana      Porca miseria. Maurizio! Jetzt wird ned gläse! Losisch du eigentlich  
au zue?!  
Maurizio      Ich cha au während em Läse lose.  
Angelina      (Angelina nimmt ihm das Buch aus der Hand.)  
Bruuch dis Hirni jetzt för eus! Claro?!  
Luana      Sitt mir eus for 5 Jahr zäme gschlosse händ...  
Lorenzo      ...halt. Das isch min Text.  
Luana      Denn halt.  
Lorenzo      For 5 Jahr händ mir eus zäme gschlosse. Dank mir. Sitt denn sind  
d'Gäldforderige vom Mafiaboss, em Alessandro Capaci, immer  
grösser worde. Eusi bitteri Gschicht wird mit jedem Tag no bitterer.  
Massimo      Ossert em Lorenzo sind mir alli im Waiseheim vo Palermo ufzoge  
worde. Bim schlimmschte Heimleiter wiit und breit, bim Signore di  
Berlusconi.  
Lorenzo      Bin ich jetzt dra oder du?  
Maurizio      (zu Angelina)  
Gib mir mis Buech wieder!  
Massimo      Ich.  
Lorenzo      Nei ich!  
Angelina      (zu Maurizio)  
Nüt gitt's!  
Luana      Ned scho wieder!

Porca miseria! Mir sind alles Waisechind ond händ eus zor chliinschte Mafiaorganisation of Sizilie zämegschlosse, will keine of dere Insle eus hett welle en Chance gäh.

Angelina Aber leider nimmt eus niemer ernscht. Bis jetzt sind all eusi Gäldbeschaffigsversüech i d'Hose gange.

Maurizio Ond d'Pizzeria, wo mir füerid, isch reini tarnig. Zom Gäldwäsche ond so.

Lorenzo Aber die lauft no schwächer als eusi kriminelle Handlige.

Massimo Ich wörd sogar säge, die lauft überhaupt ned.

Maurizio Ebe.

Massimo Ebe.

Lorenzo Ond die Situation muess sich ändere, ond zwar dali!

Luana Mir bruuchid Idee!

Angelina Mini Idee gilt immer no:  
Tanze!

Alle Ballare.  
Ned scho wieder!

Angelina (beleidigt)  
OK. Sälber schold.

Lorenzo Simmer Mafiosi oder Tänzer?

Massimo Ich wörd sogar säge, sind mir Mafiosi oder Tänzer.

Luana Silenzio, Massimo. Dis Gschnorr närvt.

Angelina Ich wörd sogar säge, dis Gschnorr närvt.

Luana Jetzt fang du ned au no so aa!

Lorenzo Was hett de Heimleiter, de Signor di Berlusconi, immer gseit:

Massimo Einisch Waisechind...

Lorenzo ...bin ich jetzt dra oder du?

Massimo Ich.

Lorenzo Nei, ich!

Luana Schloss!!!! E Plan ond basta!

Massimo Mmmmh! Pasta!

Luana Mann, bin ich omzinglet vo Irre?

Angelina Irren ist männlich!  
Los, jetzt schöttlid gfälligst öppis os em Ärmel. Ich han min Plan gseit.  
(Pause, alle scheinen zu überlegen.)

Lorenzo Als Mafiosi bruchid mir es Verbräche.

Massimo Ich wörd sogar säge, mir bruuchid es Verbräche.

Luana Aber was för eis?

Maurizio Das isch doch ganz eifach.  
(alle schauen Maurizio an.)

Lor. + Mass. Ganz eifach?

Maurizio Sicher. En Entfüerig.

Luana Ond wie stellsch dir die vor?

Maurizio I dem Buech, won ich lese, werdid es paar Osländer verschleppt ond denn verlangid d'Entfüerer es Lösegäld. Das chönnd mir doch au. Mir forderid 600'000 Franke ond eusi Sorge sind mit einere Aktion glöst.

Luana Ond was för Osländer wotsch entfüere? Irgendwelchi Rocksacktourische?

Maurizio Richi Osländer, naturalmente.

Lorenzo Oh! La Svizzera!  
 Massimo La Svizzera!  
 Maurizio Si, certo. Schwiizer.  
 Angelina Ond die chömid eifach so do äne of Sizilie i eusi Pizzeria?  
 Lorenzo (schnüffelt in der Luft herum.)  
 Schmökid ihr's au?  
 Massimo Isch öppis abrönnt?  
 Lorenzo Stupido. Nei, es liit de bitteri Doft vo Kriminalität i de Loft.  
 Luana (zu Maurizio)  
 Aber wie stellsch du dir das vor?  
 Maurizio Sudoku.  
 Lorenzo Su do was?  
 Massimo Su do wer?  
 Maurizio Su-do-ku.  
 Mir offerierid inere Schwiizer Tagesziitig als Tagespriis 6x1 Woche  
 Pizzeria Siciliana. Alles inklusive.  
 Lorenzo (lacht)  
 Sogar d'Entfüerig.  
 Massimo Chönnt vom Kater Carlo sii. Ich weiss das. Ich ha jede Mickey Mouse  
 Sammelband dehei. Jede!  
 Lorenzo Ich ha gar ned gwösst, dass du weisch, wie mer Siite ome blätteret.  
 Maurizio Isch doch genial, oder ned.  
 Angelina Ich chönnt jo am erschte Obig för d'Gäscht tanze.  
 Luana Vergiss es!  
 (schnuppert in der Luft.)  
 Jetzt schmöck ich's au, Lorenzo.  
 Lorenzo Es goht nüt über en mafiose Plan.  
 Massimo Ich wörd sogar säge...  
 Luana Pschschscht!  
 (alle schnupfern und lachen teuflisch.)  
 Maurizio. Das möchid mir.  
 Lorenzo Ond de Sproch vom di Berlusconi wird vo eus eigenhändig  
 usglöscht.  
 Alle Einisch Waisechind, immer Waisechind.  
 (alle spucken auf den Boden)

UMBAU  
 LICHTWECHSEL

## Szene 2 In Palermo am Flughafen

---

Zeit: 7'

Flughafen Palermo

Die Gewinner des Sudoku Wettbewerbes sind mit Koffer auf der Bühne. Im Hintergrund ev. Fluggeräusche. Man steht in Gruppen zusammen.

### 2.1 Man macht sich bekannt

Bella (erscheint alleine mit Koffer)  
Uh, die Wärmi. Ich muess diräkt ufpassse, dass mir s'Make up ned abe laufft.  
(setzt sich hin, nimmt ihre Schminksachen zur Hand, spricht zum Publikum)  
Ich bin immer die Erscht wo os em Flüger usstiigt. Immer. Ond die Letscht wo iistiigt. Ich hasse die Omedüseri. Aber ned wägem Flüüge.  
Händ Sie sich scho mol im ene Flogzüüg WC gschminkt? Ebe, Sie wössid, was ich meine. D' Batteriehaltig vo Hüener hett mer verbotte, aber vo de Zueständ i de Flogzüüt rett niemer. Katastrophe.

(Wicki und Sarah treten auf)

Wickie Punto d'incontro. Do sind mir richtig.  
Lukas Hoffentlich.  
Wickie Verloh dich of mich. Was ich säge, das stimmt immer.  
Lukas Om einiges wärmer als i de Schwüiz, findsch ned.  
Bella Wem seisch das. Ich hätt selle anderi Schminki met näh. Aber ich bi wieder völlig falsch berote worde.  
Wickie I dem Fall au Siegerin im Sudoku Wettbewerb?  
Bella Jawohl.  
Wickie Wickie. Freut mich.  
Bella Bella.  
Lukas Cool. Wie die os Twilight.  
Bella Hör mir uf mit dem Schwachsinn. Ich stoh absolut ned of Vampirzüügs.  
Aber s'Make up i dem Film isch ächt geil gsii.  
Ond du?

Lukas Lukas.  
Bella So hett min Grossvater gheisse.  
(setzen sich zu ihr)

Wickie Händ ihr gwösst, dass Sizilie die gröscht Insle im Mittelmeer isch? 25'710 km<sup>2</sup>.  
Lukas Nei. Ehrlich gseid, han ich vor em Sudoku Wettbewerb ned emol gwösst, wo Sizilie genau liit.  
Bella Ich au ned. Ond ehrlich gseid, weiss ich's au jetzt ned genau.  
(lacht)

Wickie Tja. Es gitt immer wieder LÜüt wo domm sterbid.

(die anderen drei treffen ein)

Nunu Min Vater hett mich vorgwarnt. In Sizilie weisch nie.  
Sarah Du meinsch, wäge de Mafia?  
Nunu Jo genau.  
Stef Vergiss es. D'Mafia hett's ned of Tourischte abgseh. För die Iheimische isch das es Problem, aber ned för eus.  
Sarah Ich ha im Fall voll s'falsche Sudoku usgföllt. Ich ha gmeint, ich ha de Fondueplausch in St. Moritz gwonne.  
Nunu Ich ha das Sudo-dings gar ned usgföllt. Ich weiss ned emol wie das goht. Mis Grosi macht de ganz Tag so Züügs. Jetzt hett sie de Priis mir gschänkt.  
Wickie Jetzt säg nome, du weisch ned, wie mer es Sudoku usföllt.  
Nunu Kei Ahnig im Fall.  
Wickie Wenn mir die Woche einisch Ziit händ, bring ich's dir bii. Isch voll easy - of all Fäll för mich.  
Lukas Hoffentlich hett die Pizzeria en Fitnessrum.  
Nunu En Fitnessrum?  
Lukas Als angehende Fitnesstrainer chasch ned ohni Sport sii. Din Körper bruucht's eifach.  
Wickie So wie ich das gseh, sind mir vollzählig. 6x1 Woche Sizilien. So isch es doch i de Ziitg gstande, oder ned?

(man nickt, man reicht sich gegenseitig die Hände und stellt sich vor.)

## 2.2 Alle Sieger kennen sich

Nunu Ich hoffe nor, d'Zahl 6 bringt mir dasmol kei Onglöck.  
Stef Bisch abergläubisch?  
Nunu S'lescht mol bin ich ame Sächste verweist. Am Floghafe hett de Koffer gfehlt, s'Taxi i d'Stadt hett en Onfall bouet ond mis reservierte Hotelzimmer isch scho beleid gsii.  
Bella Schätzli, du chönntisch mini Zwillingsschwöschter sii.  
Sarah Ich hoffe nor, Sizilie isch öppe die gliich Partymeile wie Lorret de Mar. Bi mir muess eifach Poscht abgoh, soscht wird ich depressiv.  
Stef Langwüilig wird' s eus sicher ned. Es hett of dere Insle tolli Chilene.  
Sarah Chilene?  
Stef Natürlich ned nor - aber au.  
Nunu Wo han ich jetzt min Pass?  
Wickie Sicher im Handtäschli. So wie alli Fraue.  
Lukas Hoffentlich macht s'Wätter mit. Das spart mir grad es paar Solariumbsüech i de Schwiiz.  
Bella Ändlich. Mis Make up isch wieder upgfresht.  
Nunu Tatsächlich. Do isch er.  
Lukas Was gitt's ächt hött zom Znacht i dere Pizzeria Siziliana?  
Wickie Siciliana. Ci wird im Italiänisch immer als "tsch" usgsproche.  
Sarah Heissisch du Google zom Gschlächt.  
Wickie Nei, Steiner. Werom?  
Nunu Wo isch s'Begrüessigskomite? Ich ha irgendwie es onguets Gfühl.  
Bella Ganz ruhig, Nunu. D'Italiener sind sehr gastfröndlich, aber...

Wickie ...leider au sehr onpöktlich.  
Stef Wem seisch das. Mis erschte Auto isch en Fiat Punto gsii. Dem sin Motor isch immer erscht agloffe, wenn ich scho hätti selle det sii.

Bella Ich bin total ufgrägt.  
Lukas Gohr mir ned andersch. S'erscht mol im Osland.  
Bella Ich han no nie e ganzi Woche Ferie gwonne.  
Lukas Wenn eus niemer abholt, denn laufid mir halt. So gross cha die Insle jetzt au ned sii.

Bella Laufe! Bisch du wahnsinnig. Lueg nor mini Schue a.  
Lukas Ziehsch sie halt ab.  
Bella Barfuess?!  
Typisch Sportler. Kei Verständnis för Schönheit ond Eleganz.

Sarah Signora Google. Gitt's of dere Insle au Taxi?  
Wickie Was sell die Frog? Die gitt's überall.  
Nunu Ich glaube, det vore winkt eus öpper. Leider chan ich ned läse, was of em Schild stoht.

Sarah Nicht verzagen, Google fragen.  
Wickie Momänt. Das heisst: Gewinner des Sudoku Wettbewerbes, Pizzeria Siciliana.  
Nüt wie los.

Bella Zom Glöck.  
Barfuess, dä isch jo voll öbere.  
(Wickie und Bella nehmen die Koffer und gehen ab.)

Lukas (zu Stef)  
Hesch die zwee Fraue gseh mit em Schildli?  
Stef Bi jo ned blind.  
Lukas Ich ha s'Gfühl, die Woche Sizilie steckt voller Öberraschige.  
Stef Das Gfühl han ich au.  
Lukas Denn ab is Abentüür.  
(will abgehen)

Sarah Sorry, Lukas. Öpis gäge es Föteli?  
Lukas Es Föteli? Keis Problem. Mis Face isch Stammgascht of «tilllate.ch».  
Sarah Wenn ich of Facebook nüd zom Poste ha, denn föhl ich mich sozial amputiert.

Nunu Weisch was, Sarah. Ich knipse ond du stellsch dich zwösche de Stef ond de Lukas.

Sarah Nunu, gueti Idee.  
Nunu So wörkt das grad läbiger. Das han ich im Fotikors i de Migros Klubschuel glehrt.

Stef Aber Nunu. Vo eus zwoi gett's au no es Föteli.  
Nunu För das händ mir no die ganzi Woche Ziit.  
Sarah (als Witz)  
Sofern s'Schicksal ned öppis anders mit eus vor hett.

Nunu Hör uf, Sarah! Mit em Schicksal passt mer ned.  
Lukas Mach echli. D'Schminktusse winkt wie wild. Dere lauf vor luuter Stress sicher scho wieder s'Make Up in Usschnitt.

Nunu Jetzt stönd emol ruhig!  
So isch guet.

(knipst)  
OK. Gmacht.  
Sarah Merci vell mol.  
Nunu Keis Problem.  
Stef Chömid. Die andere sind am Goh.  
Lukas Kei Angscht. Mit so Schueh springt eus d'Bella sicher ned devo.  
  
(die drei gehen ab.)

Umbaumusik  
UMBAU

### Szene 3 Die Mafia berät über das weitere Vorgehen

Zeit: 5'

#### 3.1 Lorenzo, Massimo und Maurizio planen

Lorenzo Das duuret jo wieder einisch, bis Luana ond d'Angelina mit dene Gäscht vom Floghafe zrogg sind.

Massimo Ich wörd sogar säge, dass duuret wieder einisch.

Lorenzo Muesch du mir eigentlich anduurend alles noch schnöre?

Massimo Wer? Ich?

Lorenzo Isch söscht no öpper do?

Massimo De Maurizio.

Lorenzo Aber dä hett nüt gseit. Dä lest.

Maurizio Was isch mit mir?

Massimo Aber er redt.

Lorenzo Vorhär ned.

Massimo Hesch du eigentlich öppis gäge mich?

Lorenzo Wer?

Massimo Isch schöscht no öpper do?

Lorenzo De Maurizio.

Maurizio Was isch mit mir?

Massimo Aber dä hett nüt gäge mich.

Lorenzo Wer seit das?

Maurizio Ich.  
(Lorenzo und Massimo schauen sich verdutzt an.)

Maurizio Chönd mir jetzt ändlich mit de Planig vom Verbräche wiitermache. I dem Buech isch klar beschibe, wie das gmacht wird.

Lorenzo Ond wie?

Massimo Ond wie?

Maurizio (Maurizio zieht ein Pülverchen aus der Hosentasche.)  
Mit dem do.

Lorenzo Was isch das?

Massimo Das han ich jetzt au welle froge.

Maurizio Das isch es Schlofmittel.

Massimo För was?

Maurizio För d'Gäscht. Mir verastaltid morn Obig en Strandparty. Während dere mischid mir das Pölverli i d'Drinks. Eusi Opfer fallid om, mir fessled sie ond händ eusi Geisle.

Lorenzo Cool.  
(nimmt Maurizio das Pulver aus der Hand. Zu Massimo)  
Los zue. Ich ha folgende Plan. Mir verastaltid morn Obig en Strandparty, mischid das Züügs i d'Drinks, eusi Opfer schlofid ii ond mir händ eusi Geisle.

#### 3.2 Angelina und Luana kommen zurück.

Angelina Hoi zäme

Luana Mir händ's gschafft. Sie sind alli do.



Angelina 6 Persone. Vollzählig itroffe.  
 Luana Sie händ bereits i checket ond sind jetzt of ihrne Zimmer.  
 Lorenzo Kei Zwöschefall?  
 Luana Hett alles tip top klappet.  
 Angelina Do schöpft niemer Verdacht.  
 Luana Alles bereit för de nöchsch Schritt.  
 Angelina Mir sind gspannt wie ne Fädere.  
 Massimo (reisst Lorenzo das Pulver aus der Hand.)  
 Ich im Fall au. Min Plan gseht so us:  
 Mir verastaltid morn Obig en Schlofparty, mischid eus onder d'Lüüt  
 ond geislid eus ab.  
 Luana Was?!  
 Maurizio Massimo! Dio mio!  
 Angelina Ond was sell das Polver i dinere Hand?  
 Massimo Das isch en Drink.  
 Luana In Polverform?  
 Maurizio Halt! Gib mir das Polver zrogg.  
 (Massimo reicht es ihm.)  
 Massimo Coole Plan. Findid ihr ned?  
 Angelina Ich schnall gar nüt.  
 Lorenzo Keis Wonder. Dä Typ cha dir de letscht Närv usrisse.  
 Massimo Hesch du eigentlich öppis gäge mich?  
 Lorenzo Wer?  
 Massimo Du!  
 Maurizio Rueh!  
 Mann!  
 De Plan isch ganz eifach. Das Schlofmittel mischid mir morn Obig a  
 de Strandparty de Gäscht is Getränk ond scho händ mir eusi Geisle.  
 Angelina Cool.  
 Luana De di Berlusconi hett doch immer gseit: Nor was eifach isch, isch au  
 wörklich guet.  
 Massimo Ich wörd sogar säge – genau das hett er gseit.  
 Lorenzo Bi dir isch wörklich ned schwer z'verstoh, werom mer dich is Heim  
 gsteckt hett.  
 Maurizio Angelina ond Luana. Ihr organisierid die Party ond mixid das Pölverli  
 i die Drinks.  
 Angel+Luana Keis Problem.  
 Maurizio Ond mir drei andere kömmerid eus om d'Videobotschaft, wo mir a  
 Tagesschau vom Schwiizer Fernseh schickid.  
 Lorenzo Ond scho glii flüüst s'Lösegäld.  
 Massimo Ich wörd sogar säge...  
 Alle Rueh!  
 FREEZE  
 UMBAU  
 Umbaumusik

## Szene 4 Strandparty

---

Zeit: 11'

Musik läuft. Alle tanzen eine Polonaise zu einem Ballermann Song. Dann löst man sich in Gruppen auf.

### 4.1 Die Party läuft

Bella Du Sarah. Chasch mir schnell d'Frisur vo hinde fotografiere? D'Heidi Klum seid i jedere Usgab vo Germanys next top model, dass mir sich immer muess im Griff ha, au optisch.

Sarah Momänt. Bliib so stoh.  
(reicht ihr das Handy.)

Bella Ned schlächt. För das, dass es chorz vor zwölfi isch, isch das no ganz passabel.

Sarah Jetzt ondertribsch aber gewaltig. Dini Frisur isch super!

Bella Das chonnt natürlich immer drof a, mit wem mer sie verglicht.

Sarah Ich ha sie jetzt mit minere vergliche.

Bella Denn sind mir eus einig.  
Wenn ned wotsch Miss Ichaufszentrum werde, denn bruuchsch einfach en top Frisur.

Sarah Ich retuschiere all mini Pics mit Photoshop.

Bella Photoshop? Vo dere Make-up Marke han ich no gar nie ghört.  
Hesch zuefälligerwiis es Gratis-Mösterli debii?

Stef Ond wie gfallt's dir so?

Nunu Ich bin ächt überrascht.

Stef Goht mir ned andersch.

Nunu Nor, also, irgendwie isch mir alles es bitzeli z'nett, aber...

Stef ...z'nätt? Wie meinsch das.

Nunu Mini Grossmuetter hett mir grad geschter am Telefon mini Schicksalscharte gleid ond gseid, dass es grosses Ereignis of mich zue chonnt.

Stef Ond was sell das för es Ereignis si?

Nunu Das sägid eim d'Charte natürlich nie direkt.

Stef Sie meint sicher Sizilie.

Nunu Sie hett gseid, dass es öppis anders isch.

Stef Nunu, relax. Was sell scho passiere? Lueg dich doch ome. Ond zodem hett de Herrgott sini schötzendi Hand über eus.

Lukas Du. Eis muesch mir no verrote.

Wickie Das wär?

Lukas Wieso bisch du so gschiid?

Wickie Das liit i eusere Familie. Händ all mindischtens en Dokortitel.

Lukas Scho?

Wickie De Chendsgj han ich überspronge ond drü Johr Bez händ mir glanget zom i d'Kanti cho.

Lukas Ned schlächt.

Wickie Ond bi euch?

Lukas Sportlich, wörd ich säge. Min Urgrossvater isch de erscht gsii, wo of em Eiger gstande isch.

Wickie 3970 Meter über Meer.  
 Lukas Guet möglich. Ond min Vater isch de erscht gsii, wo alli Schwiizer See dorchschwomme hett.

Wickie Do chonnt aber au einiges zäme. Ond du sälber?  
 Lukas Ich trainiere aktuell grad för en ltrag is Guinness Buech - Träppestiige.  
 Wickie Das isch nüt för mich.  
 Lukas Aber die Woche legg ich en chorzi Trainingspause ii. Mich reizt höchstens de Ätna. Ich bi no nie of em Gipfel vo me Vulkan gstande.

Wickie Das isch aber definitiv ned ganz ongföhrlich.  
 Lukas No risk, no fun, Wickie.

## 4.2 Überraschung des Hauses

Luana Cari amici!  
 I wenige Minute goht de zwoiti Tag vo euere Woche do of Sizilie z'änd.

Angelina Os dem Grund hett sich s'ganze Team vo de Pizzeria Siciliana überleit, euch zom Abschluss mit eme Drink z'überrasche.

Lukas Super. Ich mag no guet öppis verträge.  
 Bella Ich stoh voll of Schlomerbächer ond so. Das verlängeret min Schönheitsschlof of natürlichi Art.

Sarah Ihr sind eifach voll genial! Zerscht es hammer Znacht, denn die Party am Strand ond jetzt no en Drink - äxtra för eus kreiert.

Angelina Aber das isch doch sälbstverständlich.  
 Luana Bi eus laufft das eso.  
 Wickie Ond wie heisst die Schöpfig?  
 Luana Volcano.  
 Nunu Isch das so öppis ähnlichs wie Glüewii?  
 Angelina Ned ganz.  
 Luana Aber er hett's in sich.  
 Angelina Ond er füüret inne abe.  
 Stef Wänn er z'starch brönnt, gompid mir eifach is Meer zor Abchüelig. (Reaktionen der anderen)  
 Luana und Angelina gehen vorbei und reichen allen einen Becher.)

Nunu Dä brönnt scho, wemer nor dra schmöckt. Ich hätt selle mis Pändel mitnä. Ich ha eifach es unguets Gefühl.

Stef Nunu. Chopf usschalte ond chille. Alles wird guet.  
 Lukas Wie gseid, mich haut ned so schnell öppis om. Do langet so es Vulkanwässerli no lang ned.

Sarah Voll de Kick. Sizilie isch geiler als Lorret de Mar.  
 Wickie Was isch do alles drin?  
 Luana Das verrotid mir erscht nochhär.  
 Angelina Probiere goht über stodiere.  
 Bella Aber bitte kei künstlichi Süesstoff. Die gänd of s'Alter Zellulose.  
 Wickie Zellulitis.  
 Bella Was spillt das jetzt för en Rolle.  
 Luana Denn erhebid s'Glas zom Abschluss vom zwoite Tag.  
 Lukas (zu Luana und Angelina)  
 Ihr nämüd nüüt.  
 Luana Mir dörfid leider ned.

Angelina De Chef hett's verbotte.  
Sarah Wäge einisch macht doch das nüt.  
Luana Mir sind scho einisch verwötscht worde.  
Angelina Es liit gar nüt meh drinn.  
Bella Schad.  
(schaut auf die Uhr)  
Schätzlis! Es isch i wenige Sekonde Mitternacht. Öpper muess en  
Trost usspräche.

Wickie En Toost!  
(Reaktionen)  
S'Schminke fällt dir definitiv ringer als die richtige Wörter finde, oder  
tüuscht dä lidrock?

Bella D'Kombination vo Intelligänz ond Schönheit chonnt i de Natur nor  
ganz sälte vor. Ossert em Dieter Bohlen chonnt mir niemer in Sinn.

Wickie (zum Spass)  
Was meinsch zom Albert Einstein?

Bella I welere Sändig macht dä mit?  
Stef Lönd mir das! Ich säge nor:  
Of eus, of Sizilie ond hoffentlich of wiiteri onvergässliche Täg! Amen.  
(alle erheben die Becher und prosten sich zu und nehmen dann  
einen Schluck.)

Luana (zu Angelina)  
Onvergässlich isch ned schlächt. Was meinsch?

Angelina Indimenticabile. Genau so wird's werde.

### 4.3 Das Mittel beginnt zu wirken

Nunu (ringt nach Luft)  
Oh mein Gott. Das isch jo brutal.

Wickie Dä Name haltet tatsächlich was er verspricht.  
Stef Nunu. Das isch s'ideale Getränk om s'Chille z'trainiere.

Nunu Bisch sicher?

Sarah Chönntid ihr alli schnell so bliibe. Das gitt s'perfekte Pic för min  
nöchschte Poste.

Bella Momänt. Ich muess is Zäntrum. Das gitt dem Bild das gewisse Etwas!  
(Sie schiebt Lukas aus dem Zentrum)

Lukas Langsam! Langsam! Ich wott doch ned wäge dir dä Superdrink  
verschötte.

Sarah So isch guet. Drü, zwoi, eis...  
Mille Grazie!  
(alle gönnen sich einen weiteren Schluck.)

Wickie Das Züügs brönnt wöcklich wie Lava.  
Lukas Bis morn isch die Lava abchuelet.  
Wickie Aber jetzt muess ich go froge, was do alles drin isch.  
(geht zu Angelina und Luana. Die anderen gruppieren sich wieder.)

Nunu Mann, das Gsöff haut mich glaub om.  
Stef Jetzt scho?  
Sarah Was meinid ihr zo dem Bild?

Lukas Chasch mir das of s' Handy schicke. Ond dronder schriib ich: Lukas Meisters harte Trainingseinheiten.

Nunu Sind ihr ned au of einisch extrem müed?

Stef Näbe dir zue wird ich nie müed.

Sarah Vor em Zwoi am Morge goh ich nie of standby.

Lukas (gähnt)  
Jetzt, wo du das seisch.

Nunu (gähnt)

Stef Säg emol. Wieso heissisch du eigentlich Nunu? Chonnt dä Name os de Bible?

Nunu (gähnt.)  
(die anderen Gäste beginnen ebenfalls langsamer zu werden, und gähnen gelegentlich.)  
Min eigentlich Name isch Noémie. Aber mis erschte Wort (gähnt), won ich han chönne säge, isch Nunu gsii. Mit Nunu han ich mich gmeint. Ond bi dem isch es bis hött blibe.

Sarah Nunu isch en absolut coole Name. (gähnt) Jetzt foht's bi mir au aa.

Lukas Ond Stef chond sicher vo Stefan.  
(gähnt)

Stef Exakt.  
Mit dem Name chasch a keinere Party ponkte. (gähnt)

Sarah Hesch kei Öbername?

Stef Mini beschte Kollege sägid mir Moses.  
(gähnt)

Sarah Mann, ihr steckid mich alli aa.

Nunu (gähnt)  
Sorry.

Sarah (gähnt)  
Macht nüt.

Stef Ghörid ihr s'au?

Alle (alle gähnen und nicken)

Lukas D'Musig?

Alle Mhm.  
(gähnen)

Eine Musik wird langsam lauter. Alle Gäste bewegen sich in slow motion zu Musik. Man spricht noch miteinander, aber die einzelnen Worte sind nicht mehr zu verstehen. Am Schluss liegen alle schlafen auf dem Boden.

Angelina Dio mio. Das hett jetzt aber grad bombenartig igschlage.

Luana Lüüt sofort em Lorenzo a. Er hett mir gseid, er wössi es perfekts Versteck för die sechs.  
Angelina. Wenn das nor guet goht.  
(Angelina tippt die Nummer ein und hält sich das Handy ans Ohr.)

FREEZE  
UMBAU  
Umbaumusik